

25. oktober 2022

UKA2022/33

Nivaap imartaata itisilernissaanut 2023-imi misissueqqissaarnissamut Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Kristian Jeremiassen, Inuit Ataqatigiit)

Inatsisartunut ilaasortap Kristian Jeremiassenip Inuit Ataqatigiinneersup Nivaap imartaata itisilernissaanut misissueqqissaartoqarnissaanut siunnersuutaa Siumumiit ima oqaaseqarfigissavarput.

Nunatta kujataani Itilliarsuup ikerasaliarineqarnissaanut siunnersuutit arlaliusut ilaatigut kinguneraa Naalackersuisut nunatsinni imarsiornermut atugassanik ikerasaliarionnissamik pisariaqartitsineq pillugu nalunaarusiortussanngornerannik. Nalunaarusiaq Naalackersuisunit 2019-imi tamanit aaneqarsinnaanngorlugu saqqummiunneqarpoq, ilaatigullu Nivaamut tunngasoq nalunaarusiarineqarpoq, suliassartarisinnaasaalu ersarissaavigineqarlutik.

Siumumi isumaqarpugut siunnersuut manna soqutiginaateqartoq, tassami nalunaarusiatigut paasisimalerparput nunatta sineriasuani ikerasaaqqanik ikerasaaraliarineqarsinnaasunilluunniit arlalissuarnik peqartoq angallannikkut pitsaanerumik isumannaannerusumillu atugassaqartitsinnaasunik.

Innuttaasut namminneerlutik angalasartut amerlasoorujussuupput, inoqarfimmiit inoqarfimmut ingerlaartartunik, piniarianik, aalisarianik, takornarianik aammalu allatigut inuussutissarsiuteqartut eqqarsaatigalugit. Taamaammat Siumup isumaa naappertorlugu nalunaarusiaq sakkussatsialaasoq atorluassagipput isumaqarpugut, pingaarnersiuinermi tulleriiarinissamilu sakkussatut atoqqullutigu.

Nalunaarusiaq naappertorlugu Nivaaq ikerasaareerpoq, taamaallaalli ulinngasumi aqutigineqarsinnaasarluni. Tamannalu tunngavigalugu ikerasaliarineqarsinnaasunit imaluunniit itisilerneqarsinnaasunit allaniit qularnanngitsumik akisunerujussuusinnaanera ilimanaateqarani.

Nivaap tininngagaluartumiluunniit aqutigineqarsinnaanngornissaa anguniagaasariaqartoq Siumumi isumaqarpugut, tamannali qanoq akeqarsinnaanera allallu eqqarsaatigalugit Naalackersuisut Kommune Qeqertaliullu peqatigiillutik suleriaqqinnissap qanoq pinissaa isumaqatigiissutigisariaqaraat isumaqarluta. Kommunemi pineqartoq tassaavoq Nivaap itisilerneqarnissaanik isummernissamut siuttuususaq, tassanimi innuttaasut inuussutissarsiortullu qanimut tusarniaavigineqarnissaat pissusissamisuussammat.



Siumumiit Naalackersuisut allannguutissatut siunnersuutaat ilalparput, suliallu Sanaartorermut ataatsimiititaliami suliarineqarnissaa innersuussutigalugu.

Anders Olsen, Siumut.